

## **CARTA DE VALORS DE L'ASSEMBLADA OCCITANA** *occitan gascon*

L'Assemblada Occitana es ua associacion que vòu har ligam entre los actors que trabalhan entà avitar la vita occitana, a mei vòu estar un ostau comun per aqueth mond. Ja que vòu recaptar las valors que se pòden exprimir dens aqueth teishut de vita meilèu qu'ahortir las que li serián pròprias, l'Assemblada Occitana s'empara sus un sòcle minim de valors partejadas.

I - **Respècte de la persona umana.** L'Assemblada Occitana non es pas compatible dab las ideologias que nègan lo prètz universau de la vita umana. Tota pensada, tot voler o tot hèit de discriminacion, de negacion deus dreits umans, de racisme, de misoginia e d'omofobia non pòran pas brica estar tolerats per l'Assemblada Occitana. Ja deuràn estar extremats en dehòra de l'associacion.

II - **Defensa de la libertat e de la democracia.** L'Assemblada Occitana es estacada de hons aus principis deus dreits collectius, a l'ideau democratic e a las libertats individualas e fundamentalas de la persona umana. Nada entrava a aqueras valors non serà pas tolerada dens l'associacion.

III - **Reconeishença d'ua realitat occitana.** L'Assemblada Occitana es ua associacion en lenga occitana entà l'espelida de l'occitanitat (los trèits lingüistics, culturaus o politics que pertòcan l'occitan). Los que nègan o desconeishen l'existéncia d'aquera occitanitat non trobaràn pas en l'Assemblada Occitana un ostau. A mei, ja que l'Assemblada Occitana recapta mei d'ua concepcion de l'occitanitat, era i vei un subjècte politic. E aqueth engatjament politic es assumit per l'Assemblada Occitana.

IV - **Esperit de consens.** La pluralitat de sicaps e d'opinions, de còps las bregas, son lo jòc normau d'un movement coma l'occitanisme e l'Assemblada Occitana non ac vòu pas negar. Totun, l'amira de l'Assemblada Occitana es d'ajudar au trabalh comun e a la convergècia deus actors en favor de l'occitanitat. Per tant, non es pas un lòc ont calha agusar diferéncias d'opinions mes un lòc de recèrca de consens. Non s'espèra pas que los actors qu'entran dens l'Assemblada Occitana e sián d'acòrdi dab tot e dab tots los autes sòcis, sonque que respècten l'Assemblada Occitana coma escasença de s'encontrar e d'aprestar projectes comuns.

V - **Dobertura.** L'Assemblada Occitana vòu aculhir mond d'originas diferentas e a còps tractar dab gents estrangèras a l'occitanisme. Tolerància intèrna e pedagogia extèrna, si que son valors nòstas.

VI - **Lo voler.** L'Assemblada Occitana vòu recaptar primèr *actors* de l'occitanitat —mes non se substituís pas a aqueths actors— e espia cap a l'accion. La hame d'obrar entà la vita occitana es l'arsec que nos incita. Tot sòci de l'Assemblada Occitana participa aus enjòcs de societat segon las soas capacitats e promòu tostemp las valors de l'occitanisme.

VII - **Actitud.** Tot sòci de l'Assemblada Occitana se compòrta d'un biaish respectuós e s'abstien de tot acte immorau.

En signant aquesta carta, jo sossignat/ada, \_\_\_\_\_ (nom d'ostau, prenom) m'engatgi a n'aplicar lo contengut. E soi conscient/a qu'en cas de non-respècte de la carta, me pòden prepausar mesuras correctivas e pòdi har l'objècte d'ua exclusion de l'Assemblada Occitana.

Lòc:

Data:

Signatura: